

## GWEN ferch ELLIS (c. 1552 - 1594), y Gymraes gyntaf i'w dienyddio am ddewiniaeth

**Enw:** Gwen ferch Ellis  
**Dyddiad geni:** c. 1552  
**Dyddiad marw:** 1594  
**Priod:** Lewis ap David ap Gwyn  
**Priod:** Lewis ap David ap Gruffith Gethin  
**Priod:** John ap Morrice  
**Rhiant:** Ellis  
**Rhyw:** Benyw  
**Galwedigaeth:** y Gymraes gyntaf i'w dienyddio am ddewiniaeth  
**Maes gweithgaredd:** Cyfraith  
**Awdur:** Lisa Cowan

Ganwyd Gwen ferch Ellis tua 1552 ym mhlwyf Llandyrnog, Sir Ddinbych. Enw cyntaf ei thad yw'r unig wybodaeth am ei rhieni. Dengys cofnodion fod ganddi chwaer, Elizabeth ferch Ellis (b.f. c.1579), ac ewythr, Harry ap Roger yn lâl, ac iddi fynd i fyw gydag ef pan oedd tua phump neu chwech oed. Priododd Gwen deirgwaith yn ystod ei hoer fer. Bu farw ei gŵr cyntaf, Lewis ap David ap Gwyn cwta ddwy flynedd ar ôl iddynt briodi. Melnydd o'r enw Lewis ap David ap Gruffith Gethin (Lewis Gethin) oedd ei hail ŵr, ac yn 1588 trigai'r ddau mewn melin ger Llanelian-yn-Rhos. Wedi bod yn briod am ddeunaw mlynedd, roedd Gwen yn weddw eilwaith, ac yn 1592 priododd ei thrydydd gŵr, John ap Morrice o Betws-yn-Rhos. Yn y cofnod o'i hachos llys cyfeirir at Gwen fel ei 'wraig dybiedig'.

Roedd Gwen ferch Ellis yn nyddwraig ac yn adnabyddus yn ei chymuned am ei gallu i iacháu trwy swynion, 'salves, drinke and plasters', a byddai pobl yn talu am ei gwasanaeth gyda gwlan, ŷd, menyng ac eitemau eraill a roddai gynhalieth iddi. Gwnaed cyhuddiadau o ddewiniaeth ddrygionus yn ei herbyn ar ôl i swyn papur, y tybid ei fod yn perthyn iddi, gael ei ddarganfod ym mharlwr **Thomas Mostyn** (1535?-1618) o Loddaithe, uchelwr lleol dylanwadol. Wedi ei sgrifennu am yn ôl, credid bod y swyn i fod i achosi niwed. Tynnwyd Gwen i mewn i'r drosedd yn sgil ei chyswllt â Jane Conway, gweddw **Hugh Gwyn Holland** o Gonwy, a oedd wedi ffræo â **Thomas Mostyn**. Roedd dau o feibion Jane Conway yn glerigwyr Piwritanaidd a gyhoeddodd draethodau gwrth-ddewiniaeth - **Henry Holland**, awdur *A Treatise against Witchcraft* (1590), a **Robert Holland**, awdur yr ymddiddan Cymraeg *Dau Gymro yn taring yn bell o'u gwlad* (c. 1595), yr olaf o bosib yn ymgais i ddangos gwrthwynebiad y teulu i ddewiniaeth yn sgil achos llys Gwen ferch Ellis.

Pan ymwelodd beiliaid drwgdybus â chartref Gwen, cafwyd hyd i gyfarpar Catholig yn ei meddiant - cloch heb dafod, a darluniad pres a thun o Grist yn atgyfodi. Ym Mehefin 1594, arestwyd Gwen ar awdurdod William Hughes, Esgob Llanelwy, a'i charcharu yng ngharchar y Fflint. Er i'w hachos gychwyn gerbron llys eglwysig, yn Eglwys Lliansaffraid, fe'i symudwyd wedyn i Lys y Sesiwn Fawr a gynhaliwyd yn Ninbych yn Hydref 1594. Ymhlith pethau eraill, cyhuddwyd Gwen o achosi marwolaeth Lewis ap John, mab i gymydog, o achosi i fraich Robert Evans dorri ar ôl iddo ei tharo, ac o roi pryf 'diafol' mewn jygiaid o gwrw a weinwyd i'r beili William Gruffith a'i gyfeillion, sef dyfyn-ysbryd y wrach yn eu tyb hwy. Tystiodd saith o dystion yn ei herbyn - pum dyn a dwy fenyw. Mae'r trawsysgrifiad byr o groesholiad Gwen yn ei dangos yn ei hamddiffyn ei hun yn ddewr yn erbyn grymoedd cyfun yr Eglwys, y llys a'r uchelwyr. Mae'n cyfaddef yn agored iddi ddefnyddio swynion gan fynd ati i adrodd un yn Gymraeg o flaen y llys. Dywed iddi fod yn iacháu ers tua deng mlynedd, wedi iddi ddysgu'r grefft gan ei chwaer Elizabeth, a bod amryw aelodau o'r gymuned wedi dod ati am gymorth, sef yr hyn y credai ei bod yn ei ddarparu. Mae'n gwadu dod â'r swyn i gartref Mostyn, a hyd yn oed yn honni iddi weld swyn tebyg yn llyfr gweddi Jane Conway.

Er gwaethaf ei phrotestiadau, cafwyd Gwen yn euog. Ym mis Hydref 1594, fe'i crogwyd yn Sgwâr Tref Dinbych, yn unol â'r gosb a osodwyd gan Ddeddf Dewiniaeth 1563. Roedd yn ddwy a deugain mlwydd oed. Fel un ddiuniwed a ddiodefodd erledigaeth, mae Gwen ferch Ellis yn haeddu ei chofio ni waeth pa mor eithriadol oedd amgylchiadau ei chyhuddo, ei hachos llys a'i dienyddiad. Serch hynny, mae achos Gwen yn nodedig fel y cofnod cynharaf o rywun yn cael ei dienyddio am ddewiniaeth yng Nghymru. lle roedd yr hysteria am wrachod a ysgubodd dros Ewrop ac America yn ystod y cyfnod modern cynnar yn gymharol brin. Yn wir, dim ond rhyw ddeugain o achosion tebyg a gafwyd, ac o'r rheini dim ond pump a arweiniodd at ddienyddio. Yn ogystal â thafllu goleuni ar hanes dewiniaeth a'r newid mewn syniadau am hudoliaeth wen a du yn y cyfnod modern cynnar, mae'r achos hefyd yn ddefnyddiol ar gyfer astudio themâu cyffredin i sawl cyhuddiad o ddewiniaeth, gan gynnwys crefydd a'r Diwygiad, rhywedd, dosbarth cymdeithasol, a deinameg cymuned.

### Awdur

Lisa Cowan

### Ffynonellau

Richard Suggett, *A history of magic and witchcraft in Wales* (Stroud 2008)

Richard Suggett, 'Witchcraft Dynamics in Early Modern Wales', yn Michael Roberts a Simone Clarke (gol.)*Women and Gender in Early Modern Wales* (Cardiff 2000)

Gwen ferch Ellis: LIGC, Great Sessions 4/9/4/10-15NLW Denbigh Gaol Files (1594)

### Darllen Pellach

Richard Suggett, 'Y ddewines o Gymraes gyntaf i'w dienyddio', *Cof cenedl* Cof Cenedl 19 (2004), 69-96. 942.9 Jen

Erthygl Wicipedia: **Gwen ferch Ellis**

### Dolenni Ychwanegol

Wikidata: **Q18914804**

**Dyddiad cyhoeddi:** 2024-07-24

**Hawlfraint Erthygl:** <http://rightsstatements.org/page/InC/1.0/>

derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n tudalen codi arian am ragor o wybodaeth.



Arddull APA



Cowan, L., (2024). GWEN ferch ELLIS (c. 1552 - 1594), y Gymraes gyntaf i'w dienyddio am ddewiniaeth. *Y Bywgraffiadur Cymreig*. Adferwyd 20 Tac 2024, o <https://bywgraffiadur.cymru/article/c15-GWEN-FEL-1552>

Clippwr

Preifatwydd a Chwcis  
Hawlfraint  
Y Prosiect  
Cymorth  
Cysylltu

LGC  
NLW

LLYFRGEL  
THE NATION



Yn ddiwydwr  
Llywodraeth Cymru  
Sponsored by  
Welsh Government